



Komunikadu Imprensa

Periodu: Marsu 2011

Edisaun: 09 Marsu 2011

JSMP Hala'ó Treinamentu ba Autoridade Komunitária iha Distritu Viqueque

Iha loron 4 Fulan Marsu 2011 JSMP liu husi nia unidade *Victim Support Service* ka VSS hala'ó treinamentu ba autoridade komunitária iha Suco Macadique Sub-Distritu Uatu – Lari Distritu Viqueque. Partisipante sira ne'ebé mak partisipa iha treinamentu ne'e hamutuk ema nain tolu nulu resin neen (36), kompostu husi partisipante feto nain sanulu resin haat (14) no mane nain rua nulu resin rua (22). Partisipante hirak ne'e kaer papel hanesan Xefe Suco, Xefe Aldeia, representante juventude feto no mane, lia nain, OPMT, representante feto rua, membru Polisia VPU inklui mós comunidade balun.

Materi treinamentu ne'ebé fo iha treinamentu ne'e konabá Kódigu Penál no Kódigu Prosesu Penál husi Prespetiva Vítima Violénsia Bazeia ba Jéneru, Konvensaun Internasional hanesan CEDAW, Lei No.7/2010 konabá Lei Kontra Violénsia Doméstika no mós Dekretu Lei No. 3/2009 konabá Lideransa Komunitária inklui mós artigu balun iha Konstituisaun konabá prinsipiu estadu direitu no prinsipiu iguldade jeneru, nomos kna'ar ka funsaun autoridade judisiál (Juiz no Prukorador) no ajente prosesual sira seluk hanesan (Polisia - VPU, Defensór Públiku no Advogado).

Treinamentu iha Suco Macadique hetan antuziasmu maka'as husi partisipante sira tanbá foin dahuluk realiza iha fatin refere. Aktividade ne'e hetan reasaun pozitivu tebes husi partisipante sira. Partisipantes sira hato'o sira nia apresiasaun diak teb-tebes no rekomenda katak treinamentu hanesan ne'e labele halao deit iha loron ida nia laran maibe bele karik aumenta tan tempu ba loron rua ou tolu. Hafoin sira hatutan tan katak aleinde treinamentu konabá lei krime bele mos hato'o hotu konabá lei sivil nian. Tanbá comunidade infrente kazu barak liu konabá rai.

Direitor Ezekutivu JSMP, Luis de Oliveira Sampaio, haktuir katak, treinamentu ne'ebé JSMP hala'ó ba lider komunitária ho objetivu atu hasa'e koñesimentu ba lider komunitária konabá prosesu legal ba kazu violénsia bazeia ba jéneru tuir sistema justisa formal iha Timor Leste.

JSMP observa katak partisipante sira hein ho laran metin katak aktividade hanesan ne'e la to'o deit iha faze ne'e, maibe sei kontinua nafatin iha tempu sira tuir mai tanbá refere ba realidade lor-loron feto no labarik barak maka sai vítima violénsia bazeia ba jeneru.

Komunidade sira mos preokupa ho kazu sira ne'ebé ligadu ho krimi pasadu entre tinan 1975-1999. Ohin loron comunidade sei hein nafatin verdade, amizade, no justisa tuir sistema justisa

formal ne'ebé la haketak kustume tradisional ne'ebé hori uluk kedas sai abut iha comunidade nia le'et.

JSMP espera katak ho treinamentu ida ne'e bele tulun autoridade komunitaria sira nia kna'ar lor-loron iha comunidade nia le'et no materia treinamentu ne'e sai hanesan mata dalan ba prosesu kazu violensia doméstika ne'ebé oras ne'e dadaun nia natureza hanesan kazu krime públiku; katak nia prosedimentu hahu la depende ba keixa. Atu nune'e comunidade sira iha ona konsensia rasik hodi kontribui ba paz no hakmatek.

Treinamentu ne'e realiza hetan tulun finaseiru husi USAID atraves husi koperasaun ho Fundasaun Azia iha Timor Leste. Treinamentu hanesan sei kuntinua realiza iha distritu seluk ne'ebé siklus violensia ne'ebé sae makás.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Email; Luis@jsmp.minihub.org

Landline; 3323883/7295795